

Fu posto una gratia de sier Marco Malipiero qu. sier Sebastian, conte a Grado, qual voria esser fatto creditor del salario de tutto el tempo, per haver li danari; et balotata do volte, non fu presa.

110 Fu promosso, per li Proveditori sora i Monti, poter venir al Pregadi con le sue opinion, zerca adauar la campagna a Pederoba di trivisana, la qual parte pendeva, et fo posta l'ultimo Conseio di X, ma disputata hozi assai, fu presa de una balotta.

In questa matina, in le do Quarantie, per el caso di Loredani, sier Marchiò Michiel, *olim* avogador, parloe, et cussì andà drio parlando. *Post fo post prandio* con la Criminal sola, et se doveva dar a questo caso de Loredani tutti li *post prandii* per spazarlo.

Gionse hozi Battistin da Rimano capitano de fanti . . . , era a Verona, mandato a tuor per la deliberation de Pregadi, et fu posto in l'Arma-mento.

A dì 7. La note et la matina, fin vespero, fo grandissima pioza, el che, se tien, farà danno a li formenti. Et *tamen* non fè danno.

Da Ruigo, fo lettere di sier Vincenzo Griti *podestà et capitano*, di 5. Come si fa ogni provision: et par, el Po habbi rotto a Tresenta.

In questa matina, in le do Quarantie, seguite l'avogador Michiel, et cussì vol ancora 4 zorni de questa altra settimana.

Da poi disnar, fo Collegio di Savi, per dar audientia.

A dì 8, *domenega*. Fo lettere di Roma, de sier Antonio Surian dotor et cavalier, di 2 et 14. Scrive, come a Palinuro è stà prese per 6 legni di mori do galie, una del capitano Gobo zenoese, l'altra spagnuola, le qual erano partide da Napoli . . . per andar verso Siena con monition per el campo è sotto Fiorenza. Et come par siano ussiti fuora de Fiorenza 500 fanti, et passato per mezo el campo inimico, et andati a Voltera . . . , qual si teniva per el papa, et ha scaziato quel governo era dentro, et morti 500 fanti, et tien la terra per Fiorenza, di che el papa se ha dolesto molto, et vede le sue cose in mali termini, nè ha danari. Scrive, ha ditto a esso orator il papa, la Signoria li dia pagar li sali de Zervia et *maxime* in questo bisogno, et zà dete 10 milia ducati a Bologna, quando quella terra era in pericolo, a conto de ditti sali. *Item*, ha parlato el papa in concistorio, zerca li possessi che la Signoria non vol darli, et scrive che alcuni cardinali li ha parlato, la Signoria fa mal a

non voler ubedir el papa, nè si speri haver decime nè altro da Soa Santità. Scrive, el papa ha venduto 100 officii, chiamati cavalieri, per ducati 400 l'uno, che si soleva vender ducati 800 et 1000. *Item*, el papa haverli ditto de la cosa de Voltera, et che i vien aiutati sotto man, et che l' dubita non sia fatto di le sue zente quello fo fatto de francesi sotto Napoli poi la morte de Lutrech; ma che l' ha bene provisto et fato star in alozamenti sicuri.

Da poi disnar, fo Gran Conseio, vicedoxe sier 110* Andrea Mudazo. Fatto capitano de le galie di Baruto sier Piero da Canal fo soracomito, di sier Bernardin, tolto per suo padre, et è fradello di sier Hironimo, è governador de la quinquere me: et altre diexe voxe; ma XL Zivil vechio, niun passoe.

A dì 9, la matina. Non fo lettere da conto.

Da Ruigo, del *podestà et capitano*, di 7. Come l'acqua non ha fatto danno. Ha cavaleato su le rive, et se stenta haver homeni, perchè tutti vol atender da la sua banda; pur fa etc.

Da poi disnar, fu Pregadi, et leto *etiam* queste lettere.

Da Cremona, di sier Gabriel Venier orator, di Come erano zonti de li el Corte et Pavia medici eccellentissimi, qual lezeva il Corte a Padoa, el Pavia stava in questa terra, quali dicono non haverà mal, et si va aiutando a la zornata. Scrive come el duca li disse: « Orator ve dirò una bona nuova per vui; è stà fatto el vostro successor, misier Marchiò Michiel l'avogador, sicome me ha scritto el mio orator de Venexia ».

Da Mantova, del marchese, di . . . , al suo orator, *esistente què*. El se scusa de la imputation fattoli de haver fatto romper el Po, et se scusa benissimo, dicendo l' ha negà el mantoan prima, poi si dice ho fatto romper, se havesse fatto romper, haria fatto avanti l'anegasse sul mio; ma la causa è che quei di Alexandria et Pavia ha streto l'alveo del Po, sichè, cressuto, convenien romper, et però ha rotto a la Mantoanella etc.

Di Candia, di sier Hironimo da Canal governador di la quinquere me, di . . . marzo. Scrive come è morti assà homeni di la galia, et altri . . . per non esser pagati, et si mandi danari per dar sovenzion, aziò quei meschini possano viver; lui non ha el modo de sovenirli, etc.

Da poi fu posto, per li Consieri et sier Marco Moro, cao di XL, che li proveditori sora la Sanità presenti, atento non è più egritudine in la terra, che i possano venir in Pregadi per uno anno, sicome vol la soa creation del 1478, non mettendo